

礼仪典

禮儀典第一百六十八卷

天地祀典部藝文二

上拜南郊頌表

唐王勃

臣伏見總章元年十二月四日詔既清東寇將覲南岳甫資元勳旋窺大典伏惟皇帝陛下黼藻神器銜策睿圖用天老之前機戮防風之後至為而不恃懸寶位於中宸卑以自居託靈符於上帝禮凝蒼璧瑞溢元珪紫旻降祐黃祇叶矩微臣學不照古才不曠時窺宇宙之神巧觀郊禋之盛節時非苟邁懷雅頌而知歸道不虛行想謳歌而有志豈與夫周傳考室裁稱棟宇之規漢奏甘泉未息嬉遊之諷比興衰於列代較馳驟於同衢而已謹憑天則輒貢拜南郊頌十章文不足奇意有遺美臣誠惶誠恐謹言

拜南郊頌

并序

前人

微臣上稽龍繇下閱龜謀觀天地之至道考皇王之大節武宣七德未嘗踰息亂之鄉文招大功未嘗出昇平之域並能懸日月而高視駕雷雨而先鳴或皮幣而踐天階或干戈而躡乾步至於

治定創禮功成作樂振長策以叙諸侯設靈機而制羣動猶虞階已泰不能息洞庭之誅夏載克
寧不能罷會稽之戮故將體剛柔而立本法震曜而崇威一戎而寓縣平四罪而華夷服然後皇
旗大輅詔殊號於圓丘電轉雲迴奏元符於孝理天下黎人知四海之安樂寰中殊域奉三靈之
康泰德兼祥風灑道與和氣游不言而大寶用貞無事而元功有立舍彼代也其誰與哉若夫應
運而生繼天而作鼓動千載之下超騰百王之上遂能發軒庭之景曜躡隋運之頽風揖讓而取
文明指麾而清幽夏則我皇唐得之矣高祖以黃旗錫瑞靜雲火之橫氛太宗以赤羽登期補星
辰之絕縷授瑤圖於新邑付瓊曆於鈞臺人更三聖道昭千古於是俛臨睿極超四荒於鳳闕之
前端委廟堂調萬國於龍軒之下八鸞徐動頓湯文於後塵九駿長驅佇堯舜於中路邦家之具
得矣易簡之業存矣猶有朱蒙戾俗違光蓬艾之間青徼遺眈假氣陶鈞之內背熊山而構虐擁
狼潭而稽誅竊瀛海之風波弄乾坤之綱紀漢圖西返惟收五羣之名魏律東窮未出三韓之險
姦謀畜於有漸逆節成於不悔長蚊蚋之雷霆附豺狼之羽翼豈知夫至人無外撫天下以爲家
真數有歸弔羣方而罪己三門遁甲黃公成不戰之師五壘神兵元女下先登之策肅牙璋而按

律輝旄節而分麾降南宮之元老裂西營之毅卒良將首路偏戎竟野軸轅萬里旌旗四合金鈿
玉匱司空憑首勝之威鸚視龍趨將軍仗萬全之略負鼇丘而峻壁據龜壑而深溝一鼓而亭塞
無塵七縱而江山失險伐罪以明而不以眾懷遠人於絕境均惠化於殊鄰登若木以照臨折紅
桃以延佇然後分州列鎮對明月以收營返旆旋戈部元雲而振旅望神都而獻捷仰靈社以書
功辛亥謁於昭陵癸丑告於太廟時乘黑帝月旅元楊大唐有國之五十一年皇帝有天下之一
十九載也元惡既殄萬宇清矣元勳既輯萬寶成矣以爲周郊上帝載延肅慎之賓漢禮甘泉未
拯朝鮮之亂想元功而反側奉先旨以遲迴思答上靈之心以洽庶黎之望爰考吉日遂靜行宮
有司備典乘輿乃出撫元虬戴翠鳳鼉鼓擁節鯨鐘流響千乘嶽動萬騎林迴星陳而天行雷震
而霧合是時未登夫太壇也乃齋帷宮宿帳殿華蓋移影鉤陳從蹕千營夕布互蒼野而烟凝萬
幕霄懸背黃闔而霧列旣而屏翳清曉飛廉警旦孫叔奉轡王良聳策雲藏星謐宇曠山明旌軒
具照簫笳互凝陟名嶽以告成歷神丘而展事國容象物而動朝章視令而肅宸儀有睟虛徐大
帝之庭列侍無譁髣髴華胥之國於是襲袞服戒俎豆端瑞班儼華旒樂懸六代禮備三古奠惟

蒼壁藉用白茅鳴孤竹之簫管奏空桑之琴瑟感格以誠不以事動植咸驩敬神以道不以華天人合應然後駐聲名於上邑反文物於先宮因雷雨而作施法雲天而用響風行電舉未寸景而浹九垓野抃途歌不崇朝而晏六合我之元極建矣我之能事畢矣趨帝寘而振足趨皇衢以驤首不其然乎雖睿化無方比神圖而絕唱而小臣不佞撫洪筆而當仁敢作頌曰

遼河巨浸碣石危峯城分元菟塞接黃龍憑遐作梗恃險忘蒸人殘鬼哭主闇臣凶有晉不綱戎磨內逐帝隋失御皇輿外驚九縣塵征三靈霧黷長茲下慢逋我天戮五材無損千齡有聖武創元基文清寶命波恬四海明宣七政息衆以寧綏荒以令飛龍繼跡鳴鳳重光遂均夷夏迭用柔剛戈船泛月劍騎橫霜風驅海石電掃辰陽帝師無戰神兵有伐丞相陪磨司空仗鉞危雲旦起長星夜發萬壘爭屠千城自蹙功超薄伐義極兼該殊方底定善陣徐迴歸俘獻捷課績分材建侯清廟偃伯靈臺考事龜謨凝清鳳展仰觀俯察享神作祀道則推天功非在己豐隆旦出招搖夕指神壇嶽立齋館雲深鑾旗曉引葆吹晨吟山明野澈日降天臨鏘鏘盛服肅肅珪簪俎豆畢陳笙鏞間撫玉觴分獻金罍暢矩青帝鳴琴朱靈會舞上和下悅神歆人聚收驩巨野反旆靈躔恩周宇宙樂極寘埏

德因時立頌以詞宣帝之功也臣何飾焉

南郊賦

徐彥伯

維帝唐八十有五載鴻徽鑠於縣寓騰陽精握機矩還攝提以產氣配神明而作主倬四后之在天
伊萬物之胥覩左日壑右星圃吹烈火於炎丘覲堅冰於委羽莫不匍匐我聲教駿奔我珪組納大
荒之管鑰伏堪輿之扃戶茲可以孩黔羸扶盤古苞混茫而首出亦奚云於三五哉於穆我皇纂戎
而昌青氣搖社白雲入房與天地合契與日月齊光杖太乙毆羣剛共工戮兮河嶽正三苗格兮星
辰張輯稽古之禮物懸象外之舊章雖配天復禹繼嗣興湯者不其慝歟肇允神聖浸發葆命芬德
馨香崇庸祇敬吟蓼蕭以游渥合臬桑而蘊正闕石籙鈞飛沈翔泳擇明居之全法撰蒼渠之闕令
則太階平而玉衡正也庶績洪凝廣歌浩作陰鷲於下有孚顛若恢負勝之圖賁昭功之籥是以元
龜遊乎湍瀨丹鳥吟於觀閣芝房菌蠢而玉莢景雲璀璨而金萼雙脩共抵之獸躑躅苑山一稔二
米之穎紛拏畎壑邦誦中和毗歌小恙歲合作噩日交長至遘朔旦之明期擇純陽之正地欲陳大
旅展時事告紫宙之成功定皇天之寶位蜃驚司典鳴鳩歲職崇泰壇考星翼畫八卦以通道錯五

行而辨域對越精祇森羅正直木異火而殷薦豫乘雷以罔極載師清野土訓掃塵繚垣虹合參途
電聯籠組帷以艾景覆皇邸以慶煙宮伯糾其禁內饗烹其蠶周廬攢構以戢奮列纛抗莖而翩綿
繩繩都人濟濟多士九牧之守百蠻之子莫不挈鴈提羔攢驂噎軌紛鴻浴以騰逗判遙皇而佶儷
或駢肩而側足候吾君之戾止若葵藿之傾離光同江河之赴溟水也然後啟端門警仙蹕雙鳳矯
首六龍齊膝青旆霄雲紅旌彗日鏘玉鸞之鳴轆按金鷄之廣術傳畫角以啾嘈曳朱旗以駢坐呵
風伯令戒道制元冥使司律此靈祇所以保綏皇天所以宥宥於是闕龍次幸蜺幃鶉鳥司襄熊羆
奉收皇帝乃彰畫黻襲大裘端玉珽翳珠旒翼翼穆穆遂臻於圖丘躬孝享擁神休設天宗之六席
援長發之二球盥以明水薦以香羞陳蒼璧而咸事藉白茅而闡幽絜駢旄之泔淡酌元瓚之觥醪
盛哉坤極順天而見邸乳祥開曾沙業薦赫禮數於彤壺布徽音於紫縣率先於金簿之靈謹覆以
瑤筐之燕皇后介禮恭茲亞奠凝億兆之歡心注穹蒼之景盼紫微開兮天香滿神之來兮軒星纂
候黃鍾兮雪飛調大呂兮風煖曼雲和之寶瑟吟孤竹之清管石麟天矯團翠煙而上征麩鳳沕霍
迓鴻釐之無筭瑞氣蜿蜒於藪甸祥光熠爚於旄罕三觶終獻萬祇呈醮昇羽節導靈羣凝肆夏以

青暑颺登歌而咽雲微鸞鷺之颯沓致戩穀之網緼禮畢功成天旋日轉宸儀允穆后庸胥展引大
火之流旂迴夷庚之翠輦倪三蠻之崇構御六氣之遙辨覽太元之神策張集靈之瑞典草木亨兮
雷雨霏霑恩灑兮雲霄靈霽壽觴霞舉兮絲竹龢筐篚岳立兮駢嵯峨天子方合符於大庭之國
錯事以梁父之阿岱崩疑兮清嶂汶泓澄兮紫波屯千轂以靈轉整萬轡而星羅則述易象者獻風
行之繇談比興者奏時邁之歌蕩蕩乎巍巍乎無得而名言矣遂作頌曰煌煌靈臺告成功兮我君
孝享亞坤宮兮純嘏布濩延皇穹兮惟策代表霽升中兮享壽千億傳無窮兮

有事於南郊賦

杜甫

蓋主上兆於南郊聿懷多福者舊矣今茲練時日就陽位之美又所以厚祖考通神明而已職在宗
伯首崇禮祀先是春官修頌祇之書獻祭天之紀令泰龜而不昧俟萬事之將履掌次闔闔邸之則
封人考墳宮之旨司門轉致乎牲牢之繫小胥專達乎懸位之使二之日朝廟之禮既畢天子蒼然
視於無形澹然若有所聽又齋心於宿設將盥食而靡窳旌門坡隄以前驚轂騎反覆以相經頡層
城之軋軋萬方之熒熒馳道端而如砥浴日上而如萍掣翠旄於華蓋之角慧黃屋於鈞陳之星

神仙戍削以落羽魑魅幽憂於固扃戰岐慄擺華涓掉涇地回回而風淅淅天泱泱而氣青青甲冑
乘陵轉迅雷於荆門巫峽玉帛清迥霽夕雨於瀟湘洞庭於是乘輿霈然乃作夫鸞鳳將至以冲融
寥廓不可乎彌度聲明通於純粹溟滓爲之垠塉駟蒼螭而蜿蜒若無骨以柔順奔烏獲之黝黮徒
有勢於殺縛朱輪竟野而杳冥金鏐成陰以結絡吹堪輿以軒輕愴寒暑以前却中營密擁乎大陽
宸眷眇臨乎長薄熊羆弭耳以相舐虎豹高跳以虛攫上方將降帷宮之繡縹屏玉軼以覬略人門
行馬以拱乎合沓之場皮弁大裘始進於穹崇之幕衝牙鏗鏘以將集周衛鞞轆而咸若月窟黑而
扶桑寒田燭稠而曉星落蕭定位以告潔藹巖上而清超雲齒苔以張蓋春葳蕤以建杓簪裾裴裴
樽俎蕭蕭方面曲折周旋寂寥必本於天王宮與夜明相射動而之地山林與川谷俱標於是官有
御事有職所以敬鬼神所以勤稼穡所以報本返始所以度長立極元酒明水之上越席疏布之側
必取先於稻秫麩蘖之勤必取著於紛純文繡之飾惟三牲八簋豐備以相沿而蒼璧黃琮寶歸乎
正色先王之丕業繼起信可以永其昭配羣望之徧祭在斯示有以明其翼戴由是播其聲音以陳
列從乎節奏以進退韶夏漢武采之訓謨鍾石陶匏具於梗概變萬形於動植聽宮徵於砢磻英華

發外非因乎筍篔之高和順積中不在乎雷鼓之大既而鬱管挂霄柴燎窟塊騁青掌赫葩斜晦潰
電纏風升雪颯星碎拂勿佻澗渺溟茫淬聖慮岑寂元黃增霈蒼生顛昂毛髮清籟雷公河伯咸駭
駭以修聳霜女江妃乍紛綸而曖曖執絛秉翟朱干玉戚鼓瑟吹笙金支翠旌神光倏斂祀事虛明
於是潛泄乎渙汗紆餘乎經營浸朱崖而灑朔漠洵陽谷而濡若英耆艾涕而童子舞叢棘折而狂
犴傾是率土之濱覃醑醪以涵泳豈奉郊之縣獨宴慰以縱橫元澤淡泞乎無極殷薦綢繆乎至精
稽古之時屢應符而合契聖人有作不逆寡而雄成爾乃孤卿侯伯羣儒三老儼而絕皮軒趨帳殿
稽首曰臣聞燧人氏已往法度難知文質未變太昊氏繼天而王根啟閉於厥初以木傳子據終始
而可見洎虞夏殷周茲煥炳而葱蒨秦失之於狼貪蠶食漢綴之以蛇斷龍戰中莽茫夫何以從聖
蓄縮曾不下眷伏惟道祖視生靈之磔裂醜害馬之蹄齧呵五精之息肩考正氣之無轍協夫詒孫
以降使之造命更挈累聖昭洗中祚觸蹶氣慘黷乎脂夜之妖勢廻薄乎龍蛇之孽伏惟陛下勃然
憤激之際天關不敢放拒鬼神以之嗚咽高衝騰塵長劍吼血尊卑配宇縣刷插紫極之將頽拾清
芬於已闕爐之以仁義鍛之以賢哲聯祖宗之耿光卷夷狄之影撇蓋九五之後人人自以遭唐虞

四十年來家家自以爲稷禹王綱近古而不軌天聽貞觀以高揭蝨爾差僭粲然優劣宜其謀密於空積忽微判定於興廢繼絕而後覩數統從首八音六律而惟新日起筭外一字千金而不滅上曰吁昊天有成命惟五聖以受我其夙夜匪遑實用素樸以守于嗟乎麟鳳胡爲乎郊藪乃上帝之降鑒及茲元元之垂裕乎後夫聖以百年爲鶉鷄道以萬物爲芻狗今何以茫茫臨乎八極渺渺託乎羣后端策拂龜於周漢之餘緩步闊視於魏晉之首斯上古成法蓋其人已朽不足道也於是天子默然而徐思終將固之又固之意不在抑殊方之貢亦不必廣無用之祠金馬碧雞非理人之術珊瑚翡翠此一物何疑奉郊廟以爲寶增怵惕而孜孜況大庭氏之時六龍飛御而歸

焚柴賦

以報天享日精
意蠲潔爲韻

何迴

於穆聖君功高德奧利澤能廣靈祇必禱溢周夏之珍符繼三五之徽號順毗心而展禮擇良日而大報所以后土祈穀圖邱祭天雍雍濟濟翼翼乾乾建朱干而日曜張翠帳而雲懸皇帝嚴法駕而展止詔羣官而萃旃藉白茅以顛若望青壇而屹然我君精潔我后孝享容衛翩翩威儀森爽就陽之位斯在薦帝之儀罔失陶匏必成牲玉惟栗風伯戒道元冥司律惟天命子之辰惟帝告天之日

靈神以之保乂昊穹以之宥密穀核洋溢鼓鐘鏗鐃三靈同感庶物皆精故祭者修禮之義柴者告成之意燎焜煌而上熏煙牆率而傍駛朝野美乎聖澤華夷贊乎能事惠浹洽於輝庖恩汪濊於民吏則知柴而致福祭示吉蠲效周室之爲理望虞家之有年福福應兮飛炤神神來兮駕煙珪組旣陳酒醴皆潔繼功前王垂裕來哲化成而萬歲無疆禮畢而四方有截諒夏郊之義舉媿序能之筆拙

至日圖邱祀昊天上帝賦

蕭穎士

政教之始莫重乎郊祀郊祀之先莫尊乎昊天是以前王垂之於典訓後帝奉之以周旋以事大矣其儀盛焉日之至也所以明氣之至邱之圓也亦以象天之圓於是致齋於宮合樂於律羣有司肅肅以儆戒百執事乾乾而莊慄牲用騂犢以貴誠酌元酒以明質但愛人而尊祖蓋欲報天而主日天子迺乘玉輅駕蒼虬摺方珽服大裘率九儀之卿士從五等之諸侯旌旗露卷冠蓋雲浮展國容於御路行大禮乎郊邱百役旣備司儀辨位劍佩紛紜而陸離鍾鼓鏗訇而沸渭君明其義臣敬其事執鸞刀以啟毛奠蒼璧以爲贄爵一獻而上下胥悅樂六成而神祇磨至後乃取血嘗陳玉幣寘

於積薪之上燔於嘉壇之際飛燎烟於太清合蕭光於上帝是以神降我福人懷我惠時罔凶荒物無疵癘致洪化於仁壽豈不由蕭敬於大祭客有旅遊函關欽茲至道觀祀事於國典仰明靈於有昊敢陳輿頌式播元造頌曰日南至兮既望祀太一兮圓邱上萬斯年兮承天貺

至日圓邱祀昊天上帝賦

賈餗

惟天爲大惟聖奉天所以就陽位郊上元禮高明之覆育答生植之陶甄告太一以祇敬擁神休而吉蠲於是採遺範於周故封土以成邱取法於乾故象形以應圓顧椒糈之莫達憑柴燎以斯傳是時星昏東壁日躔南至爰命有司蕭將祀事羅幄帟以雲黝駢爨俎以鱗次藉白茅兮取諸潔薦蒼壁兮象其類皇威允穆司儀辨等而以班明德惟馨祝史陳辭而不愧於是啟禁扃警仙蹕千官拱立六龍齊膝濟濟鏘鏘匪徐匪疾奉常告備乘輿乃出覆玉葉之卿雲昭扶桑之初日齋心滌慮所以感無不通樂徧禮成故能神降之吉觀夫廣場還合泰壇五峙告萬物之生成當一陽之初晷揖羣望以咸秩列衆靈以備祀紫微開兮天意通元氣調兮熏風起祀之大者莫盛茲道展敬乎皇心報功乎元造奏搏拊之清樂徹純殷之蒼昊實祀典之所崇諒邦家之攸保若乃陳以牲幣酌以秬

鬯歌大呂以爲節舞雲門以爲狀達誠於氤氳之際降靈於闔闔之上騰瑞氣而宛延燭神光兮溥
暢我國家報本克禋順時修祭祀太祖於座於以敬宗祀皇天於郊爲能饗帝此所以神祇降鑒天
人合契保昌遠兮永貞崇明祀兮不替

東郊迎春賦

玉起

我皇則銅渾而有倫應木德之維新展東郊之盛禮出左个而迎春所以先庚有秩舊典攸遵將欽
承上帝而敬授於下人者也於是法駕鏗鏘嚴城翕習見太史之先謁知勾芒之已及都人士女候
彩仗以駿奔文物聲明擁翠華而鱗集莫不聽玉漏而雷動起靈壇而嶽立於是闢重門遵九達服
蒼玉載青旗草木之萌必因茲而動矣原野之蟄亦自此而啟之展聖容之穆穆引天步之遲遲有
翼有嚴不徐不疾百辟陪乘千官扈蹕遵皇衢而卻轉度青門而迴出八鸞振響隨解凍之和風五
輅騰輝映麗天之遲日東郊之中肅穆會同俎豆莘莘而駭目衣冠楚楚而鞠躬祥雲爲之郁靄佳
氣爲之葱籠青帝克禋必來顧而來饗元穹廣覆何自西而自東當是時也四遐縱觀五服來備瞻
聖皇之迴輪知太昊之整轡登臺者漸樂擊壤者咸遂莫不荷煦嫗於陰陽感溫仁於天地夫然則

跂行可以不夭根著可以漸苞異逆暑之吹幽空聞乎德肅於火殊逆寒於旁磔何足以禮行於郊則知和氣熙熙盛容濟濟必蒼龍之整駕當青鳥之司啟握金鏡而明王道調玉燭而昭國體莫不在迎春之盛禮

北郊迎冬賦

前人

我皇審緹幕候元英法天之序作人之程律變於冬必順時而冬命水盛於北亦隨方而北迎所以修舊典闡鴻名受太史之先謁率羣辟而躬營況肅殺以北陸將昭宣乎上京於時時和歲豐勞農息力結冰於坎改火於國天欣玉燭之太和人受銅渾之罔忒由是文物成聲明飾皇皇濟濟鏘鏘翼翼向仙蹕之駐方引旆於司南望曉星之殘尙建杓於禮北及夫禁城啟寒漏極分天仗而雲布遵皇衢而繩直巖飈絕元輅之響愛日動鐵驪之色一人由之而展容萬姓於焉而仰德旣而臻靈壇薦嘉餼奠之以玉縮之以茅雖布政於元堂以居乎左个而司晨者黑帝必祭於北郊蓋示敬於端冕非取樂於懸匏及夫整宸儀迴天步考時訓而咸若稽月令而畢賦導巖凝之氣無奪其倫應廣莫之風不愆於度則知北郊之爲禮所以佐天而成功亦以感神而叶中故宜百神胥饗萬寓朝

宗豈止運行而成歲閉蟄而爲冬

嚴奉郊祀御札

周太祖

王者應運開基子民育物罔不承天事地尊祖敬宗燔柴於泰壇用昭乾德瘞玉於方澤以答神靈朕受命上元宅心下土時已歷於三載漸至小康禮未展於二儀深虧大典夙宵愧畏不敢違寧宜叶著龜式陳籩豆庶展吉蠲之禮用傾昭事之誠朕以來年正月一日於東京有事於南郊宜令所司各備儀注務從省約無致勞煩凡有供需并用官物府縣不得因便差配諸道州府不得以進奉南郊爲名輒有率斂庶俾嚴靜以奉郊禋中外臣僚當體予意

合祭天地詔

宋范祖禹

朕聞五帝不相沿樂三王不相襲禮世有損益因時制宜惟我祖宗嚴奉郊廟當遣官攝事皆考合於前文唯奠玉親祠自裁成於大禮每以三歲對越二儀咸秩百神大賚四海迄先帝元豐之末講方邱特祭之儀蓋將補一代之闕略振百王之墜典朕惟菲德嗣守丕基列聖已行謹當遵奉先朝未舉懼不克堪是以昔歲仲冬竭誠大祀神祇饗答祖考燕寧前詔有司載加集議猶欲咨度諸儒

之論稽參六藝之文然理既不疑則事無可議斷自朕志協於僉言祇率舊章永爲成式今後南郊合祭天地依元祐七年例施行仍罷禮部集官詳議

賀南郊大赦表

宋祁

帝儀訖饗朝渙推慈飛驛疾傳庶邦叢慶切以天郊之重國制有常凡萬乘躬行必三歲間往不煩不怠由列聖而持循以妥以虔合諸神而哀對睿圖累盛縟典勤修恭惟尊號皇帝陛下纂大合華執中布度抵金璧之珍琬率儉示人收霜電之嚴威措刑於下克勵明德格於皇穹交熏太和冒我羣品顧懷時億瑞應日來亟歲上儀若祇舊典戒期百執領詔九州曳雲威之常羊服翠蚪之半渙殊庭一獻諸祐徧躋遂自陽靈之宮往會天元之巨羽旄四合垓陞參登上璧左琮之華合祛而信祝祖纘宗題之次更侑而迪嘗拜嘉胙於席垂列欽柴於雲表靈心合答熙典備成然後還坐中天之闈普肆隨風之澤改頒大號崇冠初元昭神之祥祈命惟永賞功赦罪已責逮瘼咸與惟新牖民衷而遷善聿懷多福道帝祉於綿區盛際有光彞倫咸賴臣嚮官舊吏殫見往朝或不愛牲玉爲恭殊非明薦或所過租賦爲復蓋出重勞語昔罕全訂今絕擬所恨清塵在望自苦周南之留紫橐仍